

A VERRA DI TROIA

(U zu Vitu vi cunta tutta la storia.)

Atto unico

Di

Antonio Sapienza

Febbraio 2009.

Personaggi:

Vito Speciale.....puparu;

Presentatore.....sua vittima designata;

Vocetra il pubblico

La scena è quasi vuota, con soltanto qualche oggetto di scena, una sedia e un leggio
Sullo sfondo c'è dipinto un paesaggio greco: montagne bianchastre, templi in rovina, alberi di ulivi, pecore al pascolo.

All'apertura del sipario, con una musica adatta, dopo un minuto circa, entra in scena il presentatore.

Presentatori -Gentilissimu, spettabilissimu, distintissimu e cumpitintissimu pubbricu, come sempri, prima d'accuminciari, u zu Vitu si voli fari priffittamenti annunziari. E comu sempri, tocca a mia stu onori. C'appoi, parrannu cu vui, tuttu stu piaceri...inzumma...lassamu stari.

Dicevu ca lu zu Vitu, prontu a trasiri, voli essiri sicuru di comu stannu li cosi: ad esempiu: quantu prissuni ci sunu prisenti, quanti ana pavatu, quanti seggi vacanti e quanti trasenu a sbafu. Niente d'eccezionali, controlli giusti...ma picchè nun si fa iddu, e lassa stari in paci e cristiani? Dicunu i mali lingu.

Stasira iddu vi cunta a storia da verra di Troia, ca comu tutti sapiti – e lu sanu macari i signi – fu na verra antica e longa assai e si cumbattiu nta l'antica Grecia tra troiani e achei -c'appoi chi schifiu significanu nun haiu capitu mai- e custau un munzeddu di morti e 'n tumulu di struppiati...e tutto pi causa...di na fimmina – tantu pi cangiari – bedda, assangata, zucarata, e ... buttana! Chista è la trama, e o zu Vitu l'onori di... sbrugghiarla.

Orbene, apprisintata l'opira, visto ca semu tutti presentati, e ca a siritina è bbona, chiamu la banna e ci dicu: attacca banna!

Rullo di tamburi. Entra u zu Vitu Speciali. Si porta, con una camminatura dondolante, al centro del palco.

Presentatori – Signori e signori, u zu Vitu Spiacialiiii.-

Vitu – Sceccu ammatula. Cchi fa? Mancu accuminzamu e già scatasci?-

Prisintatori – Cui ju?-

Vitu – No, me nanna!-

Presentatori – Ah, mi pareva...-

Vitu – Bestia spaiata e immiserita da troppu travagghiu, tintu prisintaturi di quattro sanari, omu scunzulatu a vita, c'a testa di intagghiu ereditaria, ti voi dignari e costi favellari per renderci edotti e sublimati e farini sapiri a differenza ca c'è fra signori e signori?-

Prisintatori – Nenti, picchè?-

Vitu – E allora picchè u dicisti du voti?-

Prisintatori – Cui ju?-

Vitu – No, u signor sinnucu...(tra se) Chistu è tuttu scattiatu, abbummatu e alluppiatu. Allora, visto caaju 'n'aiutanti scunghiurutu li lungo corso, mi tocca prissunalmenti, apprisintari a mia lu spittaculu.-

Prisintaturi – E ju cchi fazzu?-

Vitu – Tu ti pigghi a giacca e tinni vai. Si allicinziatu! March!-

Prisintatori – Mih, e sempri minni mannati, ora pi na cusuzza di nenti ci stati janmmannu tutta sta farsa.-

Vitu – E tu a chiami na cusuzza di nenti la differenza anatomica, corporale, ormonica e di sustanza (accenna al relativo gesto), tra un uomo e una donna? Tra un signore e una signora? Allora aiu raggiuni ju: si tuttu bestia!-

Prisintaturi- No, bestia nun mu lu dicitu cchiù, sennò m'affennu.-

Vitu – Ma daveru? Bih, varda cchi cosi, s'affenni...e ora cumu fazzu? Chi sosterrà più le sorti del mondo? Chi se lo porterà sulle spalle. Eh? A chi la pesante eredità?-

Presentatore – A noi!-

Vitu – Vili e minnicu di un pernicioso aiutanti bestia natu crisciutu e pasciutu, mi voi fari chiudiri u tiatru? Cca nun si fa politica, ccà un si fa apologia e neppure astrologia, osia antologia, trigonometria, meteorologia, e, varda cchi ti dicu? Mancu stregoneria. –

Presentatori- Va beni, i capii. Tempu persu cu vui. Vi salutu zu Vitu. (si avvia verso le quinte)-
Vito – Ahu aspetta, e cu mi fa da aiutanti in campu?-

Dal pubblico.

Voce – To soru!-

Vitu – Cu è su figghiu di bbona matri ca si primmetti sti cunfirenzi? Ss’ardenzi, ssi scrianzi?-

Prisintatori- (fermo sulla soglia) Avaia zu Vitu, ata strantisu, ccà su tutti picciotti boni, arucati e onesti...-

Vitu – (sottovoce)...e a robba manca.-

Presentatori - ...e vi vonu beni, ma tantu tantu beni...beni...-

Voce - ...da morir.-

Vitu – Sentiti, s’aviti u sbaddu, e megghiu ca vinni iti a sbriari fora di ccà Inveci, s’aviti l’armu, l’adenza e amati la cultura, assettativi zitti, boni e muti ca ora s’accumincia. (imposta la voce)

Signore e signori, alloco d’o mio presentatore - bestia infinita, infingardo, tostu e Giufà, mi apprisento da me stesso: Ecco a vui, Vitu Speciali, cuntaturi di cunti a villa comunali.

Attacca banna.-

Rullo di tamburi. Presentatore esce.

Vitu – Aspettati, al tempo...pirò, prima d’accuminzari vi vogghiu diri du palori sull’opira ca vi cunti: In primis stu cunti è na leggenda, ossia na cosa ca forsi c’è e forsi no; in secundis, pozzu pozzu, è ca sta ligginda è na libbera interpretazione del sottoscritto qui presente tra di voi, in terzis...-

Voce- ...cchi nicchi nacchi abballari cu vui?-

Vitu – Vastasi, cajordu, praiolu, sciavuni e sprudenti!-

Voce – e a mia nun mi desunu nenti...-

Vito -...nte corna...-

Voce - ...e così sia.-

Vitu – E na malanova a tia! Ahu e di unni sbarcau chissu? Abbiatulu fora.-

Voce – Aiu pavatu u bigliettu, n’aiu dirittu e obbiettu.-

Vito – E pi accamora ti pirdunu, ma non lu diri a nessuno.

Dunque, dicevo, in terzis, at’ascutari in sacru silenziu, picchè ccà, nta stu tiatru, semu comu nta tempju: il tempju dell’Arte con la A maiuscola. E ora farcitemi cuncintrari:

A verra di Troia:

Assa’ prima de canonici di lignu,
quannu i pospiri ancora ‘n s’avvintanu,
mentri in Grecia Leda jucava co cignu,
li Dei scialavano, ammazzann’ u tempju,
supr’a lu munti chiamatu Olimpu,

Giovi, tuonò: “ E luvatici manu
cu sta caciara e stu curtigghiu!
mi scassa’i baddri di lu munnu sanu:
m’annoiu di taliarivi nta facci:
e megghiu ‘nvintar’i scarpi co’ tacci,

tantu pi fari qualcosa di megghiu

ca rattarimi a panza tutt'u jornu.”
“Caru maritu – ci dissi nto sogghiu
di lu so tronu Giunoni, fimminuna
di lettu si, ma di lingua tagghintuna-

Tu si' signori, diu e patrieternu,
nunca, chiddu ca t'aggiuva cumanna;
e nuattri jemu macari nto 'nfernu,
pa truvati chiddu ca t'alliena-
abbasta ca 'n ti videmu cchiù in pena.”

Patri Giovi arrispunniu: “Dda banna,
'n sacciu chi cosa truvati di bonu.
Invece, a tutt'i to' figghi addumanna
si c'anu nto ciriveddu un'idiuzza
chi sacciu: 'n jocu, macari na cusuzza,

pi farmi arriturnari lu bon tonu”.
Minerva c'ascutava attentamenti
addrizzau aricchi e vinni o tronu.
“ Patri divinu, diu de' fummini,
aiu fattu na pinzata pi l'omini”.

“Dicci, divina figghia intelligente,
se si tratta di l'omini sciavuni,
stavolta n'addivettu viramenti”.
“Avisso' a pinzatu, si tu si d'accordu,
di fari sciarriari a ddu caiordu

di Re Minilau cu ddru Priamuni
Re di Troia, videmu, chissacciu,
macari pi na partita di palluni...”
Ma Marti ca pristava aricchia
spiranzusu, dissi: “Ma cchi c'ancucchia!

Ju sugnu spissu muti, zittu e tacciu,
ma unn'è a Juvi? unn'è u Milanu?
Chissi ancora sunu ammenz'o ghiacciu.
Nenti palla, mbari, ma na bella scerra
ci facemu fari a chissi nta terra”.

Giovi appruvò e ci desi la manu:
“ Bravu me figghiu, si nu cannuni.
Mirculi, veni ccà, finu viddanu,
organizzami tu sta bedda scerra,
ma c'apparir'a tutti na vera verra.”

Mirculi arrispunniu: “Minchiuni!
Haiu sutta manu la question:
C'è Paride ca pi na scasciuni
fila Elena, fimmina assai bedda,

mugghera di Minilau – faccivastedda.”

“Mizzica! chissi su corna belli e bboni.”
Dissi Giunoni fricannisi li mani.
“ Cusà si ‘n ci scappa macari ‘n orgioni?”
Dissi languidamente e tennira,
Ddu pezzu di ficuna di Vennira.

“Approvu tuttu. S’accuminza dumani”
- tuonò Giovi – Tu Mirculiuni
pigghia li scummiss’e sona li campani!
Ma accura tintu latru, ‘n m’a rubbari,
nunca su’ copp’a sgruscir’e a furriari!”

Ssu ‘nfamiu di un diu ‘mbrugghuni,
cu l’appoggiu di so soru Vennira,
ficiuru fari ai dui carusuni,
chiddu ca stilunu far’i ‘nammurati
quannu su sulì, beddi e arrapati.

Tuttu successi ammentri dda sira
dummiva a sonnu chinu Minilau,
(ntantu ca lu focu squagghiava la cira)
quannu n’aceddu nt’aricchia ci susciò:
“Vidi ca to muggheri fa l’affari sò.”

Accussì cu li corna s’arruspigghiau
lu gran Re di Sparta e dei dintorni,
e, comu è giustu, tuttu si arruffau.
E vanniannu a vuci forti e china,
giurò: “ A pigghiu macari fin’in Cina!”

Po’, saputu cu cui ci misi li corni,
ci lu cuntò a so frati Agamennone,
ca ci dissi: “ Lau miu, ti frastorni
assai e lu sacciu. Onde or ti dicu:
da ora dda gran Troia è me nimicu!

Chiamati tutt’i greci a riunione,
mannat’araldi a tutt’i reggimenti,
e Achilli fazzu mio campione.
Accussì c’anzi namu a li troiani
l’arrucazioni de bon cristiani.”

Armarunu la flotta in temp’i nenti,
salparunu tutti quanti bald’ e fieri,
scangiannu lu livanti co punenti.
Quann’arrivanu in terra marocchina,
Ulissi dissi: “Mammaggia a la marina!

Cu è c’ambrugghiau a storia di ieri

cu chidda ca s'ava scrittu pi dumani?
Salpamu l'ancora e turnamu arreri,
ca pi sicuru li troiani sfissati,
si stannu ammazzannu de risati.”

Voce – Chissa è na balla malandrina. V'a invintasturu stamattina?-

Vitu – Sicuru! Cu to soru a culumbrina, e or mutu sinnò caccia e camina!-

Voce – Nisba! Aiu pavatu p'addivittirimi e m'addivettu.-

Vitu - E cerca di finirla o d'addifettu.

Voce – Ah, mi minazzi? Catanisi sordi fausi?

Vitu – Cchi fai affenni? Varda ca ti calu i causi, e ti sculaccio il culetto, figghiu di sceccu d'o Maletto.

Nunca, stavu dicennu - prima ca ssu mariuolu mi scassassi i compassisi, a mia e a tuttu u paisi - ca senza pipitiari, nta na botta, li greci, scurnati, cangianu rotta.

E doppu una travirsata di cani
finalmente arrivarunu a Ilu,
che caddri nte manu, ma salvi e sani.
E accussì incominciò la longa verra
ca nuddu voli ma ca tutti afferra.

Agamennone dissi: ” Comu ju stilu,
cu me frati avemu fattu ‘n pianu:
a burrasca a ma scansatu pi ‘n pilu,
e ora e u mumentu di la spata:
Facemu na disfida a manu armata,

tra Minilau e Paride troianu;
e cu vinci si pigghia la donzella.”
Tutti li greci subbutu appruvanu,
e mannanu nu araldu a Priamu
Dicennuci: “Si ci stai ti lassamu.”

U Re sintiu questa e po' quella,
dopodicchè si tirò testa e cruci,
infini si decisi per la querella:
“Dicitici al vostro condottiero
ca me figghiu sta già sul destriero!”

Agamennon a so frati dissi duci:
“ Ascutami beddu, ma tu ti la senti?
Va beni, va beni, ma nun fari vuci.
Dicevu, chiddu è ‘n carusu ‘mpustatu,
e tu, pi valia, si ‘n pocu conzumatu”

“Ju sacciu chiddu ca mi si cunsenti,
e pi sta disfida all'ultimu sangu
haia pigghiatu i me pruvvidimenti.
Fazzu tri giri, pi l'elmu lu pigghiu,
lu sbattu pi terra e fazzu scumpigghiu!”

Lu cozzu fu duru, pareva nu tangu,
cu l'unu davanti e cu l'autr'arrieri,
l'uno vanniava l'autru mutangu.
Appo' antrasatta calau la niggia,
e Parid'era già luntanu tri migghia!

“Tradimentu!” gridaru li guerrieri,
e tutti cumpatti s'abbianu a massa:
Chi scontru feroci! spararu l'arcieri,
e u campu fu chinu di morti ammazzati,
tantu ca sinni desunu di vastunati.

Patri Giovi arristò tri uri e passa
A taliari tutt'a carneficina,
“ Mirculi fausu, mi futtisti! cassa
sta verra fratricida! Dicci a Marti
ca s'abbessa a valicia e parti,

pi almenu trent'anni, da stamatina.
E vuattri genti greca senza nei,
ripigghiati u mari cu sta siritina,
e turnati a casa unni v'aspetta,
na pignata di pasta e na scurzetta.”

Dettu questu, cunvucò tutti li dei,
li fici addinucchiari comu a missa,
E dissi “ Ascutati signori mei
D'ora in po' m'accumentu di varagghiari
ma di scerri e verri 'n sinn'a parrari.

E appoi farcitimi sta prumissa:
Pinzati sul'a jucar, a straviari;
e 'n pigghiatimi cchiù pi fissa!
Or'jamuninni a fari na manciata
e... accura di 'n fari n'antra minchiata!”

Gli applausi non arrivano e Vito, inchinandosi ringrazia come se ci fossero. Entra il presentatore.

Presentatore- Zu Vutu, vardati ca u pubbricu e mutagnulu...-

Vito – (col capo chino, come se ringraziasse) E a mia cchi minni futti.-

Presentatore – Ma...stati facennu na sorti di cumparsa...-

Vito – Mutu tu, cchi ni sai ti di comparse e di l'arti.-

Presentatore – E cchi c'entra l'arti?-

Vito – C'entra, e comu!-

Presentatore – E, di grazia, comu? (ironico impacciato)-

Vito – Comu vicinu a Milanu. Senti bestia di prisintaturi pricariu e senza avvenire, questi scalda sedie da lungi venuti p'ascutari,... u bigliettu u pavanu?-

Presentatore – Ovviu, certu, certamenti.-

Vito – E allura nun ce ne frega nenti.-

Presentatore – Comu nenti? E l'Arti cu l'A maiuscola?-

Vitu – Chidda, p’accamora, ta fai fritta cu l’ova. L’importanti è ca stasera a manciata è assicurata, e appoi ci la fai da sulu a sulu la sirinata.-

Prisintaturi – A sirinata? Quali sirinata? E a cui?-

Vito – A l’arti e a so cummari.-

Presentatore – E cu è so cummari?-

Vito – A fami attrassata, bestia ignorant, d’uso e d’abuso di acitana tistera, spreco immorale de me insegnamenti, osceno sfregio di l’arte primera (al pubblico ironico) Grazie, grazie assai siete troppo buoni... tutti sti applausi d’avveru nun li meritu.-

Voce – E annunca assuppati stu piritu. Prrr...-

Presentatore - Finu l’amicu...-

Vito – (guardando la platea con occhi di fuoco) Vastasi zaurdu intorso e tristu,

Nomato comu marranu, e messeri!

In tutto il regno di l’anticristu.

Figlio putativo di tremila cavalieri,

Varda cchi ti dicu:

Ju sugnu Vitu, puparu di lussu

E c’affenn’a s’o arti, si rump’u mussu!

C’aora arriva nu tintu cajordu...-

Presentatore – Signori e signori, prima ca a sunata volge a schifiu, la cuntata finisci ccà. E cu s’a vistu sinni và. Bonanotti a tutti.-

Escono precipitosamente, inseguiti dalla pernacchie del “critico” spettatore.

Sipario e fine.